

القصة الأولى

الرجوع بالزمن

تدق عقارب الساعة تعلن السادسة صباحًا، فيصحو سعيد على صوت ارتطام مفتاح أنبوبة البوتاجاز بجسم الأنبوبة محدثًا صوتًا مدويًا في أذنيها، حتى كاد أن يخترقهما..تن تن تااان..فيقوم من نومه وكأنه على أعتاب الحرب العالمية الثالثة من هول ما سمع..فيقول في نفسه الله إيه ده؟؟مش الصوت ده اتمنع من الحثة يجى من أربعين سنة كده؟؟ أو مال الغاز اللي راكب ده إيه لما نسمع الصوت ده على الصبح؟؟

يمر سعيد من أمام المرآة في حجرته غير مكترث كعادته دوماً لأنه سرعان ما نسي أن ينظر إليها كل يوم كأيام شبابه أيام السبسة والحفلة والحزلة والشعر المنسدل على جبينه.

يأخذ المنشفة متوجهًا إلى الحمام..وكانت المفاجأة إنه وجد أنبوبة البوتاجاز في الحمام وفي آخر الأنبوب يجلس سخان غاز قديم جدًا.. والجو كله في الحمام يعتليه القدم..فيغمض سعيد عيناه ويفتحهما عدة مرات في دهشة بالغة...إيه ده؟ هو في إيه خير إن شاء الله إيه الفيلم الأبيض واسود اللي أنا وقعت فيه ده..غير أنه يضرب نفسه على وجهه عدة مرات كي يفيق مما هو عليه..وكان يعطى ظهره للمرآة فالتفت فجأة ليرى وجهه لأول مرة منذ أن استيقظ من نومه.

إيه ده لا لا لا هو في إيه النهارده؟ هو أنا مالي صغرت كده ليه!! أنا رجعت شباب والا ايبسيه؟؟إيه ده شعري زي ما هو عيني زي ما هي مليانة حيوية الشباب...الله جرى إيه يا ض يا سعيد هو أنا شربت اكسير الشباب من أم العيال وألا ايبسيبييه؟؟ يسمع صوت والده كما كان يسمعه أيام زمان يقف عند باب الحمام ويحدث والدة سعيد بنفس النبرة القديمة.

= هو الواد ده مش هيخرج بقى؟؟ أنا هتأخر على شغلى!!

ده صوت أبويا الله يرحمه ويضرب نفسه على وجهه مرة أخرى..والمفروض بقى المرحومة أمي ترد عليه بالمره بقى زي

= شوفت أديك رجعت تهزر تانى زى زمان يا سعده.

في لهجة المندهش يقول سعيد.

= سعده إيه وعيل إيه وبتاع إيه هو فى إيه؟؟ ينظر إليه عبد السميع وهو يخرج من باب الحجرة .

= مالك يابنى أنت إल्ली فى إيه إنت شارب حاجة والا إيه عموماً هعدى عليك كمان شوية يمكن تكون اتحسننت شوية.. ماشى يا سوسو.. تمام يا شالبربش؟

تدخل أمه الغرفة وقد استعاد سعيد نصف وعيه فيظهر في ملامحه الرعب ولكن عيناه ينتابهم الحنين إلى رؤية أمه مرة أخرى.. كانت أمه تحمل بيديها الورد الذي يحبه سعيد.

= أنت وحشتيني أوى يا ماما بقالى زمان ما شوفتكيش زى ما أنت يا ماما.. ما اتغيرتيش من يوم ماااا

= من يوم ما إيه يا واد أنت؟ أنت على طول بتهزر كده والا الواد جمال شريك حاجة أمبارح.. أه ما أنا عارفاه عيل مش ولا بد.

=لأ يا أمى جمال إيه أنا بهزر معاكى.. بهزر بس معلش إديني قلمين كده على وشى عايز أفوق كده علشان مش عارف ادي نفسي قلمين أصل زى ما انت شايفه كده.

تضع أمه الورد فى الفاز المجاور لسعيد على الكمودينو وتقول له.

=ههههه قلمين بس؟ مفيش فايده فيك يا سعيد عموماً مش أنا اللي هديك قلمين أبوك.. زمانه جاي من الشغل وهو اللي هديك ميت قلم مش قلمين بس.. أبوك عرف موضوعك مع البت سعاد بنت الجيران وحالف لما تفوق يرجعك المستشفى تانى.. ما تستعجلش.

وعندما حل الليل نفذ سعيد فكرة راودته بعد حديث أمه وتسلل وهرب من المستشفى مع إنه لم يكن هناك داع للهرب لأنه مريض عادى وليس مقبوض عليه وكان الأولى به أن يخرج بكل

سهولة أمام الجميع..ولكن سعيد شخصية تهوى المغامرات بدون داع..مشى سعيد أعلى كوبري قصر النيل الذي لم يتغير كثيرًا عن سابق عهده ولكن أنواع السيارات بالنسبة له تغيرت كثيرًا فالسيارة ال128 تغزو القاهرة والتليفونات ميناتل وتليفون العملة ينتشر هنا وهناك .. وفى كافتيريا بقصر النيل كان عنده موعد تذكره فجأة مع سعاد حبيبته.. وكان يجلس على ترابيزة فى انتظارها.

تقترب منه سعاد ذات السابعة عشر من عمرها وهو ينظر إليها وعيناه ملؤها الدهشة وكأن رجل عجوز يجلس فى انتظار فتاة صغيرة من عمر أولاده ..فيضع يده على عينه وجبينه ويفرك فيهما..تجلس سعاد بسرعة أمام سعيد على الكرسي المقابل له .

= إيه يا بنى بقالك كام يوم مش باين ليه ؟؟ ده غير إن أبوك عرف الحكاية وحالف ليقول لأبويا وباينها هتبقى ليلة سوده يا شالبريش لازم تتقدملى بسرعة..سعيد سعيبيد!!.. شالبريبيبيش .

= هاه غايب كام يوم ؟؟ قولي كام سنة !!

تنظر إليه سعاد بدهشة.

=كام سنة إيه ما أنا لسه شيفاك من يومين..

= يومين؟ أه فعلا ما انتِ عارفة بقى معلش اصلى لسه داخ من التعب..

= أه صحيح أنت إيه اللي هربك من المستشفى؟ أبوك بيدور عليك ولولا الممرضه شافتك وإنت نازل من على ماسورة شباك المستشفى ما كانش أبوك عرف إنك هربت مش هتبطل الحركات دى يا سعيد؟؟صحيح أنت هربت ليه؟؟

=هربت؟ اه اه اصلى بحب المغامرات

= المهم هتيجى تقابل بابا امتى بقى؟

= بابا؟ مابلاش يا سعاد اصل أنا روحت المستقبل ولقيت حياتنا هناك زي الحلاوة يعنى.

= مستقبل وحلاوة..مستقبل إيه أنت هتستعبط قول إنك عايز تخلع من الجوازة وخلص..عمومًا أنا ماشية ولما تعوز تقابل بابا أنت عارف البيت سلام يا بتاع المستقبل.

ينظر سعيد إليها وهى تخرج مسرعة وهى تهمهم بكلمات نايبة لا يفهم منها شئى ..فيقول فى نفسه

= فى ستين ألف سلامة ده أنت هتوريني الويل فى المستقبل اللي مش عاجبك ده..ياللا فى ستين داهية. بينما هو جالس فى نفس مكانه بعد خروج سعاد يجد زميله جمال، ولكنه فى عمر الستين وهو أيضا زميله فى العمل فيقول باندهاش

= الله الله إيه ده ؟ ده الواد جمال أهو وسنه كبير أنا كده مش فاهم حاجة هو أنا صغير والا كبير ومش سعاد لسه خارجة ولعنة سلسفيل أبويا علشان ما روحتش لأبوها ..أنا هنادي عليه وأشوف كده..

= ولا.. ولا يا جمال ..خد تعالى هنا!!

= ولا ؟وجمال وحاف كده ؟؟ أما إنك عيل قليل الأدب صحيح أنت اتجننت يا ولد وألا إيه ؟

تمر ثواني ويدخل جمال نفسه قبل أن يرفع أبوه يده وينزل على وجه سعيد..

= بابا حاسب ده سعيد صاحبي فى الكلية وهو رخم ويحب الهزار معلش يابابا!!وكمان علشان أبوه لسه ميت من شوية سامحه يابابا..

= أبويا أبويا مات ؟ أمتى ؟

ينظر إليه جمال ويغمز له بعينه اليسرى دليل على انه يمزح لكى يخرج من الموقف السخيف.. يخرج أبو جمال من الكافتيريا بعد مواساة سعيد فى موت والده..يجلس جمال أمام سعيد علي نفس الطاولة.. ويدس يده فى جيبه ويخرج لفافة بها نوع من الحشيش ويناولها لسعيد فى يده.

= ها ياعم أظن الحنة اللي خدتها المرة اللي فاتت مخلياك
شايفني دلوقت عيل صغير..مش كده؟

ينظر إليه سعيد بدهشة

= هو أنت اللي عملت كده؟ بس تصدق انه عالم جامد اوي يا
جمال! اه بس المرة دي بقي خد شوف الصنف ده هيوديك لحد
فين هيوديني لحد فين يا جيمي؟ ناوله جمال اللفافة واطبق عليها
في فمه بيده .. ثم سكب في فمه الماء وقال..

= ها أنت فين دلوقت؟

هيوديني فين يا جيبميبيني؟

وفي تلك اللحظة

يطبق ضابط البوليس يده على يد جمال ويضع فوهة المسدس
فوق رأس سعيد الذي راح ينظر إلى الضابط مندهشاً

الضابط= عرفت هيوديك فين يا سعيد؟

سعيد= عرفت يا باشا يوديني فين.

القصة الثانية

الاتوبيس

اسمه الحقيقي سعيد لكن أصدقاءه أطلقوا عليه اسم شالبريش
منذ طفولته.. لأنه لم أقول الآن، سأتكلم عن الاسم في نهاية
القصة، لأن شرحها يطول وهي قصة كوميدية جداً ستجعلك
تضحك من قلبك.. يعني أتمنى أن تضحك من قلبك عزيزي القارئ
واسمح لي أطلق عليك عزيزي.. اتفقنا؟

دعك من الاسم الآن ونذهب إلى الفعل.. شالبريش شاب دائماً
يقحم نفسه في مشكلات عدّة ومعظمها تنتهي في قسم
الشُرطة.

يظن إنه ذكي وهو فيه من الحمق ما فيه..يعتقد إنه هو الأصح والأصلح، ورأيه دائماً هو الصواب، حتى أنه يقاطعك وأنت تتحدث ويجور على حقك في إيصال فكرتك، لأن فكرته هي الأفضل.. فضولي مغامر ومقامر وغبي، في نفس الوقت فنان ومبدع.. أقصد مبدع في الغباوة طبعاً..والأدهى إنه يخرج من المشكلة ولا يعترف بخطأه ابداً.

شالبريش كان ينتظر الأوتوبيس على المحطة كالمعتاد كل يوم وهو ذاهب إلى عمله..يأتي الأوتوبيس مسرعاً فيتكور الناس داخله ويقف سعيد علي قدم واحدة نصفه في الداخل، والنصف الآخر متعلق بحبال الهواء ويمسك بيد واحدة..تطير ملابسه في الهواء وتلتصق في وجهه كرافته العتيقة تموزج سنة ثلاثون ويطير الهواء شعره المنكوش المجعد..بالكاد يقف ويتوازن على باب الأوتوبيس.

يأتي إليه المحصل الذي يدخل وَسَط الناس بكل خفة ويلتصق أحياناً بأجسادهم الذي يعتربها العرق، ووسط رائحتهم المختلفة فمنها الجميل ومنها دون ذلك، يالها من مهنة شاقة ولكنه في كثير من الأحيان ينجح في العبور بين الناس.. ثم وصل أخيراً إلى شالبريش.

= تذاكر يا حضرات تذاكر يا أفندي ياللي واقف على السلم.

= تذاكر إيه؟ انت مش شايفني واقف بنص رجل إزاي

= أنا مالي يا أفندي أنا عايز تذكرة علشان المفتش لو طلع ممكن يوديني في داهية بسببك.

= بسببي أنا؟ أنا مالي ما الحكومة هي اللي مش موفرة لنا المواصلات الدمية.

= ياسيدي ما تدخلنيش في السياسة أديني تذكرة وريح دماغك.

= سياسة إيه يا عم.. دي مش سياسة ده حقي كمواطن الدستور بيكفل لي كده.

= ياسيدي أنا مالي ومال الدستور أنا بقولك أنا عايز تذكرة خليني أشوف شغلي الله يهديك.

= يهديني غصب عنك ومش دافع غير نص أجرة كمان.. = نص أجرة ليه إن شاء الله؟

= لأنني راكب بنص جسمي بس يا ذكي.. أنت مش شايفني؟

= انت اللي مش هتجيبها البر على جنب يا أشرف.. = أشرف؟
أشرف مين هو كل السواقين لازم يبقى اسمهم أشرف؟

يقف أشرف في منتصف الطريق.. يتوقف الأوتوبيس وَسَط
همهمات وسباب من باقي الركاب.

= ما تطلع يا أسطى إحتًا متأخرين على شغلنا..

ويقول آخر

= سيبه يا كمسري ده راجل غلبان.

يخرج شالبريش عن صمته ويقول

= أنا مش غلبان أنا مواطن يا مواطن.. أنا لازم ادفع نص أجرة.. أنا نصي الثاني مش مستفيد من الأوتوبيس بحاجة.. بقولك أطلع يا أسطى نهارك مش فايت النهارده.

يتحرك سائق الأتوبيس فجأة بعد أن تسبب في تعطيل المرور لمدة نصف الساعة.. وتوقف أخيراً أمام القسم.. ثم سحب الكمسري شالبريش من ياقته إلى داخل القسم حيث استقبله الضابط بالترحيب.

= اهلااااا شالبريش هو أنا يابني ما ورايش غيرك؟

ثم صاح الكمسري

= إنت تعرف الواد ده ياباشا؟!

= أعرفه؟ ده هو اللي مشغل القسم هو إحنا ورانا غيره..
سيهولي واتكل انت على الله.. ده حبيبي.

= مش لما تعرف هو عمل إيه الأول ياباشا؟

= لااااا مش لازم تحكي أنا هعرف الحكاية منه بالتفصيل يالا مع
السلامة أنت..وكمان عايز أعرف حكاية اسمه الغريب ده كمان.

بدت على المحصل فرحة وقال.

= ما أنا ياباشا نفسي أعرف معنى اسمه أنا كمان.

ينظر شالبريش إلى المحصل.

= انت مش كنت مستعجل وحضرت المفتش هيخرب بيتك؟

في زاوية من القسم يقف بعض المجرمين داخل القفص
والعساكر التي تقوم بحراستهم يقولون في صوت واحد.. = واحنا
كمان ياباشا نفسنا نعرف معنى اسمه الغريب ده.

أما في زاوية ثالثة يقف بعض القراء الذين يقرأو قصة شالبريش،
في صوت واحد

= وأحنا كمااان عايزين نعرف معنى الاسم الغريب ده يا باشا اااا.

القصة الثالثة

الإجازة السعيدة

(القلعة)

قررت زوج سعيد أن تخرج عن ما هو مألوف عن يومها الروتيني
في الطبخ والتفكير في البيت.. وطبعاً تويخ خادماتها الصغيرة التي
أتت من بلدتهم.. فهي بنت صغيرة قريبة لزوجة سعيد وأخذتها
عندها، منها تسليها ومنها تساعدها في أعمال المنزل حتى يأتي
إليها ابن الحلال ليأخذها ويذهب..

قفزت زوج سعيد إلى أذنيه مرة واحدة وكان الرجل يجلس في الأتريه في الركن الخاص به.. المكان الذي يعشقه بجنون وإن بدل المكان لا يعرف متابعة أي شيء ولا الحديث في أي موضوع..فهو بالنسبة له طقس من الطقوس المقدسة..إذا وجد أحداً يجلس مكانه يظل واقفاً دون كلام، حتى يجلس في مكانه المقدس وبعدها تستطيع أن تتحدث معه في أي شيء يحلو لك.

اقتربت منه تفيده وهي تمد يدها بكيس من اللب بعد أن وضعت له في طبقه المفضل..الطبق المصنوع من الصيني..فهي عندما تضع له حبات اللب في هذا الطبق يطلق صوتاً يقشعر له جسده وقلبه صوت اللب وهو يصدر هو الآخر صوتاً حنون على أذنيه الكبيرتان..هنا، وهنا فقط، تستطيع تفيده أن تطلب طلبها وهي تعرف إنه سوف يوافق على الفور.. نظر إليها سعيد بنصف عيناً.. وهو يعرف أن لها طلب.. وهو ينتظره منها..

= ها ما تقولي عايزه إيه يا تفيده ؟ أصل أنا عارف حركة اللب دي وراها ايه؟

= أنا ؟ ولا حاجة يا سعيد أنا بس حاسه إنني زهقانة كده يا أخويا ..و..

= وإيه يا تفيده .. شكلك طمعانة في يوم الجمعة اللي ما بصدق أنام فيه..مش كده؟

= يا سعيد انت على طول نايم ما تخلينيش أتكلم بقى.

ما تتكلمي يا تفيده هتقولي إيه يعني؟

بعد محادثات ومباحثات ومداولات استمرت خمسة وأربعون دقيقة وهي عمر الشوط الأول من مباراة الكرة الذي يعشقها سعيد..استطاعت تفيده الانتصار على سعيد واقنعتة بالخروج في يوم الكسل العالمي والنوم أمام شاشة التلفزيون.. استطاعت أن يوافق على الخروج..ولكنها نسيت أن تقول له أين تريد أن تذهب وعندما التفتت لتخبره عن المكان.. وجدته غارق في نومه ويمسك في يده كوب الشاي ويعلو شخيرته في أرجاء المنزل..

كان كوب الشاي متدلي من يده ويكاد أن يقع على الأرض..
التقطته تفيده من يده بسرعة ووضعتة على المنضدة..وجلست
بجوار سعيد تتابع هي آخر خمسة دقائق من مباراة الكرة.

وفي الصباح كانت تفيده تحضر بعض الأشياء التي سوف تحتاجها
في الرحلة..أشياء صغيرة جداً، إذ جلبت حقيبة من حقائب السفر
الخاصة بزوجها سعيد ووضعتها على المنضدة وفتحها على
مصراعيها، ودست فيها عشرون رغيفا من الفينو الكبير فئة
الواحد جنيه.. كانت السندوتشات مختلفة ومتنوعة بين البسطرمة
والجين الأبيض والقشطة بالحلاوة التي يحبها سعيد وراء كل اكلة
كتحلية.

ولم تكتفي بذلك بل وضعت برطمان من الخيار الصغير كانت قد
صنعتة خصيصاً منذ أسبوع لتلك اللحظة التي تدبر لها منذ
شهر..وسرعان ما طلبت من البنت الصغيرة أن تساعدها وتذهب
إلى المطبخ لتجلب لها موقد صغير لصنع قهوة سعيد المفضلة بعد
الطعام، وطبعاً لاتنسى البن والفناجين وهي عائدة.

ودست أيضاً داخل الشنطة الموز والبرتقال وثلاثة كيلوات من
الفراولة لزوم التحلية بعد الغداء.. وقامت بدس أي شيء اعتقدت
إنه سينفعها في تلك الرحلة.. وكان أخيراً المشهد كالتالي..لاتعرف
تفيده كيف تغلق الحقيبة من هنا أم من هناك.. وطلبت من
الخادمة الصغيرة أن تقف فوق كرسي المنضدة وتقفز على
الحقيبة لعلها تدك حصونها وتغلقها..وكانت المحاولة دون
جدوى..أفاق سعيد على صوت ارتطام الفتاة بالحقيبة وصرخات
تفيده ،نظر إليهم كنظرة المغشي عليه من النوم..ووضع منشفته
على كتفه ومضى في حاله إلى الحمام وكأنه لا يعرفهم من
قبل..واستمرت محاولات تفيده والبنت حتى تمكنت من إغلاق
الحقيبة ولكن الحقيبة كانت أخيراً تشبه القبلة الموقوته التي
ستنفجر في أي وقت.

خمسة أيام عن القلعة وجمالها والهواء هناك وووو..ثم صرخت فجأة في أذن سعيد الذي كان نائماً تقريباً وهو يستمع إلى حديث الشيخ الشعراوي قبل الذهاب إلى المسجد لأداء صلاة الجمعة.. قام سعيد من غفوته مذعوراً ينظر إلى تفيدة بعين ملؤها الشر..

= أنا عرفت إحنا ممكن نخرج نروح فين.

= هو إحنا خارجين يا تفيدة؟

= الله هو جرى إيه يا سعيد هو إحنا اللي هنقله هنعيده

= كنت بهزر معاك يا تفيدة..ها خير قررتي تروحي فين؟

= أنا كنت اتكلمت مع مفيدة بنت خالتي إحسان ما أنت عارفها..قالت لي إننا ممكن نروح القلعة وقعدت توصف في جمالها والهوا وكده.

= تمام تمام بنت خالتك قالت كده؟ بس بنت خالتك دي صغيرة ووزنها|||

= تقصد إيه يا سعيد انت قصدك إني كبرت وما أقدرش أطلع القلعة؟ طب بالعند فيك هنروح يعني هنروح يالا يابت جهزي الشنط علشان نازلين..

تجري البنت مسرعة إلى حيث الحقيبة المكتظة بالطعام والشراب وتضعها فوق رأسها وتطير فوق السلام إلى الشارع أمام المنزل، ثم ينزل خلفها سعيد وتفيدة التي تتأبط يد سعيد لتعيد الأيام الخوالي، ولكن سعيد سرعان ما تخلص من يديها ووقف ينادي على تاكسي بالأجرة دون جدوى.. فعندما كان يراهم سائق تاكسي يهرب منهم...شعرت تفيدة بأن سعيد سوف يلغي الرحلة فاقترحت عليه أن يركبا الأتوبيس وبعد عناء كبير وافق سعيد علي مضمض.

انحشر سعيد وتفيدة والبنت معهم داخل الأتوبيس ومعهم حقيبتهم الكبيرة.. وبعد وقت طويل داخل الأتوبيس استطاعت تفيدة أن تجد مكان بجانب رجل قروي.. ولأن وزنها كبير فقد جلست على

نصف الرجل تقريباً.. وثب الرجل من مكانه وهو يتمتم بكلمات نابية تسللت إلى أذن سعيد.. الذي راح يكيل له اللكمات من هنا وهناك وبادله الرجل لكمة اطاحت به إلى الخلف مصطدم بتفيدة الذي ضرب اللون الأحمر تحت عيناها وصرخت صرخات متتالية.. حتى تدخل باقي الأتوبيس يضربون بعضهم بلا سبب.. وكان الناس ينتظرون الانفجار لأي حدث صغير وكل من له مشكلة في حياته ضرب من بجانبه ضرباً مبرحاً، وانتهت المشاجرة إلى داخل قسم الشرطة.

عندما دخل سعيد إلى القسم نظر إليه الضابط مطولاً ثم أردف.

= مين؟ سعيد شالبريش بنفسه هنا يا مرحب يا مرحب.

= اهلاً سعادة الباشا.. أصل الحكاية إن مراتي....

= أصل الحكاية إن ما ورايش غيرك ياسعيد كل يوم والثاني اصطحب بوشك الجميل ده حتى يوم الجمعة..

= ياباشا أهو وشي ما بقاش جميل زي ما أنت شايف أهو.

= أخرس يا سعيد بدل ما أرميك في الحجز.. الله ومين اللي جنبك دي يا سعيد؟

= تفيدة مراتي يا باشا وده الراجل اللي بوظ عنيها اللي كانت جميلة وو..

= وإيه يا سعيد أنا قلت لك تخرس خالص.. خدوا الراجل ده ارموه في الحجز.. تعالي يا ست تفيدة ممكن تحكي لى إيه اللي حصل؟

بعد شرح ومداولات استمرت عدة ساعات، تم الإفراج عن سعيد شالبريش وزوجته الكريمة تفيدة.. وعلى باب قسم البوليس كانت البنت المسكينة تضع الحقيبة فوق رأسها وتقف خلف تفيدة ثم أردفت تفيدة وهي تضع يدها على عيناها الحمراء ثم قالت..

= عايزين نلحق يومنا ياسعيد لأحسن القلعة ممكن تقفل يا خويا.. هتوديني يا سعيد؟

يقفز سعيد في الهواء وهو يشد شعره من الغيظ
= يا هووووو!! أنا هوديكي المشرحة دلوقت يا تفيدة.
إلى اللقاء مع شالبربش في مغامرات جديدة